

Date – 21/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Khawcheng karah naupangte an him zawk nan vawiin hian Aizawl Dist-ah zirna in te a ni hnih nan khar chhonzawm a ni .
2. Horticulture Department Minister Prof Lalnilawma'n sawhthing chu sawrkarin loneitute dawrin a lei dawnlo a, a leitu turte leh a chingtute indawrna tur a ngaihtuah sak dawn a ti.
3. India leh Malaysia chuan thawhdunna tur inremna thuthlung chi hrang hrang an ziaak
4. India leh Japan chuan nimin khan 2+2 Ministerial Dialogue New Delhi-a neihah thawhdunna hrang hrang an thlirho



RAIN HAVOC

Khawcheng karah naupangte an him zawk nan vawiin hian Aizawl Dist-ah zirna in te a ni hnih nan khar chhonzawm a ni dawn a,

Aizawl Dist Magistrate chuan thuchhuah siamin khawcheng avanga lei hnip leh chirh a tam avang te in naupang him zawk nan vawiin hian zirna in khar chhonzawm a ni ang a ti a, Indian Meteorological Dept in khawchin a thlirlawknaah ruah la sur zui tura a hmuh avang pawhin naupang him zawk nan chawlh hi puan a ni a ti.

Tunhnai Ruahsur nasa hian khawsak phung ti khaihlak nualin, sumdawna hmun leh sorkar pisa te erawh dan pangngaiin a inhawng a.

Zirtawpni kalta atanga ruahsur hian hmun thenkhatah tuilian a siam bawk a, District pathum – Aizawl, Champhai leh Mamit ah chhياتna thlengin mihring thi leh hliah erawh an awmlo a ni.

State Disaster Department atanga thudawn danin Aizawl khawpui chhungah Ngaizel, Chaltlang Lily veng, Edentharr Vengchhak, Chanmari West, , Bungkawh leh Chawnpui vengah te leimin avangin kawng a ping rih a, Bung Bangla ah pawh lung tla in kawngpui hnawh phuiin Govt Complex ah leimin vangin chhungkaw 3 chu hmun him lama thiarchhuah an ni.

Champhai District ah chuan Chhangphut field, Govt. Champhai college road ah leimin awmin hemi vang hian kawng a ping rih a, Champhai leh Aizawl inkalpawhna kawngah pawh leimin hi awmin hnathawktuten an thian fai mek a ni.

Mamit District ah chuan West Phaileng atanga Dapchhuah panna kawng leh West Phaileng RD Block, Hnahva ah leimin a awm a, thawktuten thianfai mekin kawng hi a la tlang rihlo a, NH 44A Mamit leh Aizawl inkalpawhna pawh leimin vang hian a ping rih a, thawktuten thenfai hna an thawk nghal bawk a ni.

<><><>

CM ASSAM RIFLES

Chief Minister Pu Lalduhoma'n Aizawl khawpui atanga Assam Rifles sawn chhuah hna chu Union Home Minister-in kum khat chhunga zawh theih a ni tih a sawi thu House a hrih.

Chief Minister Pu Lalduhoma chuan Hachhek bialtu MLA, Pu Robert Romawia Royte zawhna sawi zuinaah Assam Rifles chhuah dan tur chungchanga inremna thuthlung, MoU chu sorkar hmasa leh Assam Rifles-te'n a hnan hnan ve vea an neih chu a hlawhtlin loh avangin sorkar thar hnuaiyah ama kaihhruainain ngaihtuah that leh a ni tih a sawi a, an inrem lohna laite sawiho mah se an chingfel mai thei lo a, hemi hnu hian Home Ministry kaihhruaina hnuaiya chingfel thuai a rawtna chu sorkar laipui chuan kar khat chhunga tihfel an tum thu an hrih thu a sawi.

Hetihlai hian AR lamin an MoU an ziah that an nghak leh a, sorkar laipui lam thu a hmuh chu a khawtlai ta tih sawiin, vawiin thlengin sorkar laipui hmalakna erawh a la hlawhtling lo a ni, a ti a, tuna an nghah chu MoU sawifel a nih thu sawiin, Home Minister sawi dan chuan, AR sawn chhuah hna chu thla thum dan zelah kalpuiin, kum khat chhung chuan AR insawn chhuah chu zawh fel theih a ni ang tiin a hrih thu a sawi a ni.

Pu Lalduhoma chuan Assam Rifles insawn chhuah avanga Zokhawsang hmuna loneitute harsatna chingfel turin Mizoram sorkar chuan AR-te nen inbe remin feh kawng thar lai turin ruahmanna siam a nih thu a sawi bawk a ni.

<><><>

HOME MINISTER

Home Minister Pu K. Sapdanga'n Mizoram leh Assam-te'n ramri an tih ve ve a inan loh avangin ramriah harsatna a thleng thin tih House a hrih.

Nimin sessionah zawhna chhangin Home Minister Pu K Sapdanga chuan tun hnaiah Mizoram leh Assam ten ram neitu zawk nia an inchhal ve vena hmunah Assam Sorkar-in Assam Police Camp panna tur kawngah hma an la tih Mizoram sorkarin a hria a, Kolasib District thuneituten a hmunah kal chilh nghalin, an hna leh an hmalaknate chawlh tir nghal tura hriattir an ni tih a sawi a ni.

Zawh belhna chhangin state pahnihte'n ramri an tih ve ve a inan loh avanga harsatna thleng thin a nih thu a sawi a, hemi avanga state pahnihte'n ramri a kutthlak lo tura status quo kalpui mek a nih thu sawi bawkin, hetihlai hian ramriah kutthlakna a awm leh thin avangin sorkar chuan inbiakna a kalpui chhonzawm tih a sawi. ZPM sorkar atangin CM level-ah inbiak tan a ni a, chumi bawhzui chuan tun hnaiah Aizawlah Minister level a inkawmna pawh neih a ni, a ti a, heta an thu dah angin, sorkar hotu Secretary level-ah pawh inbiak chhonzawm zel turin thu an dah ta tih a sawi a ni.

<><><>

HORTI MINISTER

Horticulture Department Minister Prof Lalnilawma'n sawhthing chu sawrkarin loneitute dawrin a lei dawnlo a, a leitu turte leh a chingtute indawrna tur a ngaihtuah sak dawn a ti.

He thu hi nimin Assembly thutkhawma zawhna leh chhanna hunah sawiin Minister chuan sawhthing chingtuten an hralh theih nan sawrkarin theihtawp a chhuah a ti a, sawrkar chu a leitu ah tang lo in an indawrna tur lo ngaihtuah sak tu tur ani dawn a ti a, a chingtuten tha taka an hralh theih nan theihtawp an chhuah tih a sawi.

Minister chuan Mizoram chhungah sawhthing mi 20,102 in an ching mek tih sawiin tun dinhmunah sawhthing tam 6586 report an dawng a ti a, department in sawhthing tam buaipui turin chak takin hma a la mek a ti a, society khaw tinah din ani tawh tih sawiin chak zawka hmasawna a awm theih nan an bawhzui mek tih a sawi.

Prof Lalnilawma chuan State pawn atanga thlai leh thei lakluh leh endik chu Horticulture Department hmalakna hnuaiah a awm loh avangin a him leh him loh endik chungchangah Horticulture Department chuan hriat a nei lo a ti a, Thlai leh thei lakluh him leh him loh endikna Pesticide Residue Analysis Laboratory siam tura hmalakna duanchhuah chu thil tha tak a ni a ti bawk.

Mizoram chuan Mizoram thlai thar 4 – sawhthing, hmunphiah, hmarcha leh aieng te chu Research nena kalpui mek ani tih sawiin thlai leina turin sawrkarin rate a siam tawh a ti a, sawhthing chu cheng 50 aia tlem loa lei tura ruahman ani tih sawiin hmunphiah chu cheng 100 leh cheng 80 in lei ani dawn tih a sawi bawk.

Minister chuan RKVY hnuaiah Mizoram Vety College in project kum 3 chhung an buaipui hnuaiah thlai thar state dang atanga lakluh test vek theih tura ruahman ani a ti a, hemi buaipui nan cheng vbch 11.8 an sanction a ti a, first installment ah 2.65 crore hmuh tawh ani tih sawiin hei hian nasa takin hmun dang atanga thil tha zawk lakluh kawngah a pui dawn niin a sawi bawk.

<><><>

MIMA PR

Mizoram Merchant Association ten thuchhuah siamin Kolasib District lirthei pawl naktip atanga tiam chin awm lova lirthei eng chi mah Kolasib district chhunga tlan a rem tih loh, thu chhuah an siam chuan mipuite a nghawng thei hle turah an ngai tih an sawi a.

He kawng danin a nghawng tura lang chu mipui nitin mamawh ei leh bar, oil thlengin a ni leh dawn tih sawiin he thilah hian sumdawng tumahin an thil zawrhte chheprelh lo tur leh ti to lo turin an ngenin an hriattir tih an sawi a. Hemi denchhena Lo ti to leh chheprelh hriat an nih chuan MIMA in a puang zar ang an ti.

Mizoram chak lakna kawngpui ber chhe lutuk hi MIMA chuan a veiin siamtha tura ngenna thuchhuah a lo nei tawh tih sawiin Kolasib District Motor neitute hmalak tumna chuhi a thain, kawng siamtha tur in hmalak thuai ni se an duh an ti a. Lirthei pawl hrang hrangte hma lakna kawng siamtha rang tura nawrna hi MIMA chuan thlawp tlat a ni, an ti.

<><><>

CHILD RIGHTS

Mizoram State Commission for Protection of Child Rights (MSCPCR) chairman Pu Jimmy Laltnanmawia'n naupang pawikhawihute laka mipui nawlpui rilru puthmang siamthat a la ngai nasa hle a ti.

MSCPCR hotute chuan nimin khan Aizawl Press Club-ah thuthar thehdarhtute kawmin an hmalakna leh mawhphurhna hrang hrangte an tarlang a, he hunah hian an chairman Pu Jimmy Laltnanmawia chuan Mizoram mipui nawlpuiin naupang enkawlina kawngah hma an sawn laiin hmasawna tur a la tam thu a sawi a, naupangte humhalhna Dan tha tak tak te chu naupang ti hlulangtu leh ti pawngpawrhtu ang deuha ngai an la awm chu a dik lo tih sawiin, naupang kum 18 la tling lote chu pawl an khawih a nih pawhin 'hrem tur an ni lo va, siamthat tum tur an ni' tih hi khawvelin a pawm dan leh tuna Dan hmanlai-in a tum ber pawh a ni, a ti.

MSCPCR hi India Parliament-in “The Commission for Protection of Child Rights (CPCR) Act, 2005” a pass anga dan-in a phut angin kum 2018 khan din a ni a, naupangte dikna chanvo humhalhna dan chi hrang hrang kenkawh dan vil zui te, a tul apianga sorkar thurawn pekte chu State Commission din chhan ber a ni tih an tarlang bawk.



INDIA AND MALAYSIA

India leh Malaysia chuan labor and employment, Ayurveda leh tualchher damdawi, digital technology, culture, tourism leh thalaite leh infiamna lamah thawhdunna tur inremna thuthlung an ziak. Ram pahnihte hian public administration, sawrkar inrelbawlina siamthatna leh lehlam lehlam remtihnaa thawhdunna mutual cooperation lamahte inremna an ziak bawk a ni, Nimin khan heng inremna te hi Prime Minister Narendra Modia leh Malaysian PM Dato Seri Anwar bin Ibrahim te New Delhi-a an inbiak hnuah ziahfel a ni.



2+2 MINISTERIAL MEETING

India leh Japan chuan nimin khan 2+2 Ministerial Dialogue New Delhi-a neihah thawhdunna hrang hrang an thlirho. He hunah hian Defence Minister Rajnath Singh leh External Affairs Minister Dr. S Jaishankar leh Japanese Minister of Defence Kihara Minoru leh Minister of Foreign Affairs Yoko Kamikawa te an tel a. Inhmukkhawmnaah hian ram pahnih inkara thawhdunna awm mekte tih len zel dan tur kawng an zawng a. An chhehvel leh khawvel thil thleng pawimawhte an sawiho bawk a ni.



IMD ALERT

India Meteorological Department (IMD) chuan ramchhung chhak lam, hmarchhak leh chhim lamahte ruahsur nasa turin a hrilhlawk. IMD chuan heng hmunah te hian inralrinna turin orange alert a ti chhuak a. West Bengal, Sikkim, Arunachal Pradesh Bihar, Jharkhand, Odisha, Assam, Meghalaya, Nagaland, Manipur, Mizoram leh Tripura ah te tun thla ni 25 thlengin ruahsur nasa hle turin a hrilhlawk a ni. Heng bakah hian Tamil Nadu, Puducherry, Karaikal, Lakshadweep, Coastal Karnataka, Coastal Andhra Pradesh, Yanam, Rayalaseema, Telangana ah te ruah a sur dawn a. Kerala leh Mahe ah vawiin hian ruahpui a sur nasa hle dawn a ni a ti. Himachal Pradesh leh Uttarakhand ah te tun thla ni 26 thleng ruah a sur dawn niin IMD chuan a sawi bawk a ni.



PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestre am a ni ang.

